



MAISON PIÈRE DES SOEURS
BENIGNAIRE DE L'IMMACULÉE-CONCEPTION
2100, CHEMIN SAINT-CATHERINE
MONTREAL, P. Q. CANADA

Histoire Sainte

道
原
精
萃

第三冊

天主降生言行紀畧

卷三卷四卷五



天主降生時如德亞圖

每度計程二百里

至度 陸地 主度 一百里 一百里

地

中

海



- | | | | | | | | |
|-----|------|-----|------|-----|---------|----|------|
| 一 | 協靈撒稜 | 二 | 白稜 | 三 | 厄貌城 | 四 | 白法蘇村 |
| 五 | 伯大尼亞 | 六 | 葉利閣 | 七 | 厄弗稜 | 八 | 伯大巴辣 |
| 九 | 撒瑪利亞 | 十 | 西加爾 | 十一 | 西洛 | 十二 | 則撒勒亞 |
| 十三 | 納雜勒 | 十四 | 吉加納 | 十五 | 納嬰夫 | 十六 | 弟伯里亞 |
| 十七 | 達瑪斯 | 十八 | 大葛發翁 | 十九 | 瑪日但 | 二十 | 伯撒依達 |
| 二十一 | 底落 | 二十二 | 西圖 | 二十三 | 則撒勒亞斐利伯 | | |





甲 耶穌坐於

山、以真福八

端訓衆、

乙 諸弟子、環

侍聆訓、

丙 樂聞主前

之人

丁 婦女扶老

攜幼、親炙耶

蘇、樂聞聖訓、



天主降生言行紀畧卷之三

極西艾儒畧述

山中聖訓

第一章

耶穌與宗徒同在山中。四方聞而至者無算。爭願親就耶穌。於是耶穌大展好生之德。凡病者。被魔者。一就無不立愈。從者彌衆。耶穌仰首。顧弟子而先諭以眞福八端。曰。神貧者乃眞福。爲其已得天上國也。良善者乃眞福。爲其將得安土也。涕泣者乃眞福。爲其將受慰也。嗜義如饑渴者乃眞福。爲其將得飽飫也。哀矜者乃眞福。爲其將蒙哀矜己也。心淨者乃眞福。爲其將得

見天主也。和睦者乃眞福。爲其將謂天主之子也。爲義而被窘難者乃眞福。爲其已得天上國也。

又曰。爾聞前聖嘗被世人窘迫乎。故吾復誨爾曹。若誤認爾爲不善。深惡爾。彼無當於汝之實。則妄甚也。顧爾爲主而遭此。倍可嘉焉。爲必獲天上之厚報也。復歔歔慨歎受世福者而言曰。爾富矣。貴矣。安享之。以爲樂在是矣。汝飽且飫矣。惜哉。其必將有饑渴矣。爾笑樂矣。哀哉。其必將有涕泣矣。茲受人之讚美矣。痛哉。其必將受苦辱不堪矣。

又向弟子曰。譬汝輩如地上之鹽。鹽宜有味。若失其味。則凡物

皆無味矣。又奚取焉。不過棄置道傍。踐踏之耳。又譬爾輩如照臨之光。山巔之城。不能隱也。又如燈燭。不受籠罩。必置諸高臺。照徹羣迷。汝德須光明。令人見而仰之。肖爾善。且歸功上主。讚美爾大父焉。

又曰。爾勿以我之來也。爲更定教法暨前聖之言也。我實成全斯教。與其所已言者也。天地可有終窮。斯教斯言。一字一畫。必無空幻。故凡口傳經典。開導諸人者。在天國尙爲微末。惟躬行經典之旨。垂則而開導諸人。乃於天國爲大焉。若爾所作善。但如發利塞俄之徒。逞口辨給。其於天國。遠矣。遠矣。古有言。毋殺

人殺人不必要言。我有進於是。若以忿怒加人。即可議其罪矣。若以怒聲叱人。可定其罪矣。若實加以狂人之名而詈之。則已負地獄刑矣。

無故怒人。或有故而怒太甚。則其過均在於我。若以義理怒人之惡。且以義理責之。乃無罪焉。後做此。

今有人獻物天主。因而憶及憾我之人。寧先向彼求解。而後獻焉可也。古有言。毋行邪淫。邪淫不必言。我有進於是者。凡目視他人婦女而心悅之。則心已姦。若爾右目爲邪情之媒。寧剗斯目。不就地獄。毋全斯目。以就地獄也。若爾右手爲誓尤之囹。寧斫一肢。以保全身。勿惜一肢。以永敗全體也。

此言人須嚴絕犯罪之端。且凡親友

及所日用人物。猶我耳目手足者。苟陷我於不善之端。亦必當嚴絕之。以避其誘也。古有言。棄妻者。遺以



甲 耶穌在山
施訓、

乙 門弟子環
聆聖訓、

丙 訓人先和
睦昆弟、然後
獻禮於主、

丁 主命五官
三司、嚴絕犯
罪之機、

戊 訓夫婦不
得分離、

己 訓人毋指
物發虛誓、

庚 訓人愛仇、
周急、



休書。我有進於是者。凡於己之妻。終身無離。於人之妻。終身無

合。

人妻縱因犯奸。或已相離。然夫在不可妄與之婚合。若耦已失。再嫁娶。則聽之矣。

古有言。毋發虛誓。

誓虛固罪。我有進於是者。概不必誓。指物而誓。實亦不可。何者。天主至尊。固不可指以誓。且如天。乃天主之座。如地。猶天主措足處。豈可指乎。卽協露撒稜城。人君奠鼎焉。豈容指乎。至於爾之首。亦不可指。何故。爾髮黑白。欲以己意移易。尙弗能。况爾首與生命。豈爾可自主乎。夫既無可誓以自明。則用何法。但果有是事。則曰是。無是事。則曰非。是非之外。更無他可明心迹也。

按諸

聖解。不可誓者三。事不實。或事雖實。而所關尙輕。或漫呼大主以證。皆屬有罪。然終以虛誓爲重戒也。

又曰。古人云。去人目。而欲以其目償之。去人齒。而欲以其齒償之。我不願爾之有爭也。有人掌爾右頰。則以左頰轉而待之。有人欲告於官。奪爾一物。則以二物倍與之。有人役爾走千步。爾宜加二千步以足之。有人稱貸爾物。爾勿吝借之。

又云。古人云。愛爾者愛之。惡爾者惡之。今我有言。仇爾者宜加愛焉。惡爾者宜加恩焉。誹爾詈爾者。爾宜禱其安吉焉。其妄證窘迫爾者。宜求天主施福於彼焉。人待爾如是。爾加人。宜不如是。蓋愛愛我者。惡人能之。愛亦何功。加恩其恩我者。異端能之。何見其仁。愛不愛我者。愛功大矣。恩亦如是。誠如我言。爲天主

愛一切人。乃天主眞子也。何故。天主命日普照。雨露潤澤。不分善人惡人之地。勉而效之。其子乎。

又曰。爾輩慎勿爲善以圖人知。如是。則大無報於天國矣。故凡爾濟人。勿若詐善者。惟冀榮名。喜在大衢公堂。如吹樂器以號於衆。衆知之。亦報矣。爾輩濟人。務求隱避。右手施之。不使左手知也。乃大父徹見其隱。必報之矣。誦經祈禱。亦勿如詐善者。欲衆見而共讚。若是。亦云報矣。於天國何與焉。汝乃深閉門戶。儼對大主。靜心莊誦。卽有求焉。不妨祈禱。蓋天主。爾之大父。無時不與爾通。卽未求。亦知爾所需。况求乎。然求時。非誦念之多。有

口無心。如異教者可得。惟真切簡當爲要也。是以當求曰。在天。我等父者。我等願爾名見聖。爾國臨格。爾旨承行於地。如於天焉。我等望爾。今日與我。我日用糧。而免我債。如我亦免負我債者。又不我許陷於誘惑。乃救我於凶惡。亞孟。人能默契斯旨。又救人罪。則在天爾父。亦赦爾罪。爾不救人。必不蒙赦爾矣。齋素自有正義。枯槁其形。使人知其脩苦。天主奚取焉。齋之日。寧爲容以自隱也。

又曰。貨寶固宜深藏。第不宜藏之於地。地有虫侵。有盜竊。藏於天。則無是慮。且寶藏所在。心必隨之。藏於土。心亦繫於土矣。故

人不可事二主。有二。必有一愛敬。一疎慢。爾事天主。可分心役於貨財耶。且奚用過求。不觀花鳥乎。鳥能播種乎。能覆藏乎。然飲食自如。花之爲物。不組織而成章。帝服不能肖。一草木之微。大父必顧存之。况爾輩貴於花鳥者乎。故衣食不必終日營營。爾大父自知爾需。務先求天國與諸德之全。則其他物。皆見賜於爾者矣。

又曰。爾不輕議人。人必不輕議爾。爾務恕人。人必恕爾。爾竭力多施人。必見施爾滿囊也。爾若度量以施。亦必施爾以度量也。又曰。瞽能相瞽乎。俱蹶陷矣。徒能勝師乎。得與師齊已矣。彼僞

善者。第見人目之有小草。不覺己目之有巨木。故欲去人目之小草。必先拔己目之巨木。

又曰。爾毋誤認僞善者。彼羊質而狼心。爾宜以其行察之。索肥菓。葡萄於荆棘中。必不可得也。心爲善之府。亦惡之藏。言乃心之華。行乃心之實。未聞惡根能結善菓也。然不結善菓之樹。必伐而焚之。

又曰。爾勿以聖物與犬嘗。勿以珍寶置豕前。置豕前。則壞於踐踏。與犬嘗。則噬之矣。

又曰。爾務專乃志。以向於道。未有求而不應。尋而不得。叩而不

啟者。子求食。父必不與之石。乞魚。必不與之蛇。人雖不善。尙克以美物與其子。爾至善大父。將美貽爾。又可知也。但凡欲人施於爾者。爾當亦以是施於人。此乃古經古聖之要旨也。

又曰。噫。世塗廣矣。世門寬矣。繇戶遵塗甚易。不知其日就於死路也。嗟乎。天路甚狹。天門甚小。難於步趨。不知其日就於生境也。

又曰。爾何頻呼我爲主耶。旣呼而復不遵我命。何也。凡得升天者。非徒頻呼吾主而已。必遵我父在天之旨。始云得也。異日

指審

判之日。將有哀向我者曰。吾豈非因主之能。而能知隱微未來事

乎。非因主之名。而能逐邪魔者乎。非因主之力。而能爲諸奇異顯蹟者乎。我必曰。從未識爾。爾乃爲惡之徒。速離我。惟如我父之旨而行。斯謂之因我者矣。又訓諸徒曰。譬彼構宅。立基深固。居之乃安。雖遭風雨飄搖。雷霆震撼。巨浸衝激。毫不折損。何者。爲其基之堅厚也。若聞而不行。則築舍浮沙。圯敗必矣。衆皆悅服聖訓。覺其施教。正如居尊申命。大異於發利塞俄之流也。



甲 耶穌在山
前徒、

乙 耶穌下嶺、
從者甚眾、

丙 癩疾之人、
跪求療治、

丁 癩者聚居
處、

戊 耶穌以手
撫摸、癩疾遽
癒、

己 癩者奉命
入城、詣司教
處、



葛發翁又聖蹟

第二

耶穌山中講道畢。旋往葛發翁城。途一癩者。

國俗凡染癩者。不許入城。恐其惡疾

過人。故在道旁求恩。

身無完膚。哀訴耶穌。前曰。吾主。倘肯則能潔我矣。耶

蘇首肯曰。允哉。潔矣。乃舒手撫之。癩者卽愈。復命之曰。爾勿語

人。惟詣主教鐸德之前。遵行梅瑟之禮。

梅瑟禮。凡癩者特蒙主祐。必先詣鐸德前。聽其

詳察果瘳。乃詣聖殿獻禮謝恩。始許入城。與衆人交接。

病者感恩。不能緘口。到處宣揚。又

城中一外方武官。爲其愛僕病危。先因如德亞耆老以請。耆老爲之懇求。且述其慈愛人民。亦曾創造一聖堂之功。初托親友遠迓。繼乃躬迎道左。耶穌許往救。武官曰。吾主曷敢辱臨敝廬。

願錫一言。吾僕愈矣。予卑微武夫。所領兵士。去來是聽。况耶穌
命乎。耶穌乃顧從者稱之曰。我於如德亞。未嘗逢如此信德者。
吁。將來異地之人。必有得與古聖同享天國。而獨本國之子。將
被驅於幽暗。受無窮殃也。復顧武官曰。爾歸。因爾信。允爾求矣。
武官抵家。僕已愈。計其時。正耶穌所許之時也。



甲 葛發翁城、

乙 耶穌因者

老懇請、許往

救僕、

丙 親友遠來

迎接、

丁 武員跪迎

耶穌、

戊 武員兵卒、

己 武員助建

之堂、

庚 武員宅第、





甲 納嬰城、

乙 嫠婦喪孤

子、哭甚哀、

丙 耶穌憐母、

活其子、

丁 死童應命

而起、

戊 送葬者、驚

異讀主、



納嬰聖蹟

第三

將至納嬰。甫及城。遇喪車送葬者紛然。有婦哀甚。乃寡嫠。止此孤子而殤也。耶穌憐而慰之曰。爾勿慟。爰撫牀。擡者止。呼之曰。穉子。我命爾起。死者卽起。遂能言。

西國風。人死踰日卽葬。而送時。置於屍牀。昇至墓所。故吾

主一命。死者卽作而言也。

諸送葬者無不驚異。而讚謝大主之慈。又曰。先知大聖作矣。上主降臨寵顧我矣。於是遐邇喧溢傳之。





甲 衆人目觀
耶穌起死之
奇、

乙 若翰因諫
君被囚、

丙 若翰遣二
徒往詢契利
斯督、

丁 醫者、跛者、
聾者、癩者、羣
聚於耶穌前、
聆訓受惠、

戊 耶穌一一
愈之、囑回告
若翰、

己 跟隨耶穌
之人、



若翰遣使詢主

第四
章

若翰諫其君被囚。聞耶穌起死異能。乃命二徒詢曰。果是契利
斯督。衆所共望者乎。抑尙有後來者與。

若翰蓋無不知耶穌爲
眞主。特借此以發明於

衆

耳。時疾者羣聚。耶穌皆立愈之。遂謂若翰徒曰。爾歸。宜述所見

以告也。瞽者視。跛者履。聾者聞。癩者潔。死者活。貧者得受訓惠。
不妄疑議我者。有厚幸也。如是而已矣。二徒歸。耶穌舉若翰語。
衆曰。汝輩出適曠野。視何物乎。其風搖之葦乎。其衣軟衣者乎。
衣軟衣者。則居王宮之內矣。抑視何物。其先知者乎。我實語爾。
彼尤勝於先知者也。古經有云。我遣諸若。

譯言天神。蓋指若翰
盛德超倫。猶天神超

人類也。

與爾爲前驅。卽此人也。自古及今。凡生於父母者。未有踰若翰之聖者也。然而在天國最小者。又踰若翰也。天上之國。非強勉不能格。努力者入其手矣。又提醒如國亞之學士等。不率教者曰。此等似乎市童。相與嬉歌。怪無人和。相與哭泣。怪無人淚。若翰不飲不食。彼則以爲有魔。人子旣飲旣食。彼又以爲貪饕。吁。彼惟喜負自智而已。



甲 洗范請耶
蘇赴謙、

乙 耶穌與宗
徒入座、

丙 瑪大肋納
跪耶穌座後、

墮淚濯聖足、
以髮拭之、以

香傳之、以口
親之、爲悔過

自新之表率、
丁 富室二人

咸貸其錢、一
五百、一五十、

俱不能償、主
均免之、耶穌

因洗范疑議、
設喻曉之、

戊 洗范



救悔罪婦

第五
章

發利塞俄有洗茫者。延耶穌。耶穌與宗徒入坐。城中一婦曰瑪大肋納。向染不潔。聞耶穌至止。慚悔圖新。亟攜香液。趨座後。俯首垂淚。卽以淚滌耶穌足。用己髮拭之。香膏沃之。口親之。洗茫心中謂耶穌果先知者。必明此婦爲罪人。而不容彼足前也。耶穌知其思之謬。發問曰。今有二人於此。咸貸錢于富室。一五百。一五十。皆不能償。主俱免之。則感孰多乎。曰。負多者感多矣。耶穌曰。然。乃顧此婦。復謂洗茫曰。我入爾室。爾未備水以滌我足。斯女也。以淚濯之。以髮拭之。爾未備油以沐我首。斯女也。以香

液傅我足。

如德亞國古禮。凡延客者。必備湯水以濯其足。且以香液沐其首。口親其面。以表鍾愛。故耶穌發端如此。

夫是故。因彼愛多。蒙赦亦多。則愛少者。蒙赦亦少矣。顧婦曰。因爾信。爾罪赦矣。安意以往。



逐魔諭異端 第六

章

耶穌返。從者愈多。不遑飲食。有進負魔者於耶穌前。其人啞且瞽。耶穌爲逐其魔。豁其目。啓其光。衆罔不駭服。惟發利塞俄輩傲且妬。妄意揣度。謂必以魔魁攻魔耳。耶穌知其念。顧謂之曰。夫一國中。互攻互賊。則通國靡子遺矣。設魔各懷離異。相排擊。豈不立盡。謂我以魔攻魔。則爾子弟從我而攻魔者。繇誰所使。必將云上主之能矣。若然。則爾子弟亦將判爾罪矣。夫我以主之全能驅魔。天國豈不爾近耶。兇強者自守其險。則所得之物皆安。若更有強者勝之。則奪其所恃兵戈。而所攫者散矣。凡不

與我借者。我敵也。不與我同收穫者。必耗失也。夫獲罪他端猶

可赦。獲罪聖神者。永不赦矣。

按經。獲罪聖神者有六端。妄恃主慈。犯命無忌。一也。失望主宥。不復

改圖。二也。攻斥已見真理。三也。妬忌他人福寵。四也。固執不聽善勸。五也。怙終不悔前惡。六也。

木之佳否。以其

實驗之。言生乎心也。惡輩心已壞。何能出善言乎。儲美者以美
出。儲醜者以醜露。審判之日。卽一浪語必訊。刑賞皆從爾言以
定也。



甲 法利塞、俄

不信耶穌靈
蹟、別求證據、

乙 耶穌責法
利塞、俄、詐偽、

丙 先知若納
之舟、

丁 若納被舟

中人投入海
中、大魚吞之、
三日後復吐
於岸、入尼你
物城、

戊 級罷王后、
聞撒落滿之
寶、遠來求教、



論疑眞主之罪

第七
章

發利塞俄輩。屢見耶穌靈異。猶然不信。欲得天上證驗爲據。耶穌謂衆曰。彼惡類作僞。我不欲以他驗示之。第以若納豫知者。

三晝夜居鯨腹。而後安出。

按古經若納古先知曾承主命往尼你物名郡以天主聖怒警戒其惡若

納難之乃買舟別往避命方解纜狂風大作航幾沉若納醒知必因犯命乃危衆爾甘受投海以息風救人遂入海大魚吞之三日後竟復吐於岸若納乃往彼城傳諭國主與諸士民悔過改圖嚴齋四旬方蒙主宥則人子亦必處於

地心三晝夜是足證也。

指死後三日復生

噫將來審判之日尼你物大

郡之人必起而面斥此輩之罪。蓋彼因若納之言。卽能改圖。矧斯之愈於若納者乎。南方有鈹罷國王后亦必起而斥其罪。蓋

彼聞撒落滿國君之賢。卽遠來受教。况斯之愈於撒落滿者乎。又曰。鬼魔或離人身。求安無所。欲歸原處。復增益七魔與偕往焉。則其後惡重於前矣。彼惡人亦猶是耳。

論順主者爲親

第八章

耶穌方設教諭衆。中一婦忽揚聲向耶穌曰。厥胎何幸得懷爾也。厥乳何幸得哺爾也。耶穌應曰。聞上主之訓而遵之。斯謂之幸焉。爾時聖母暨親屬昆弟造門。阻塞者衆。莫能入。有告耶穌者曰。若母若兄在門。耶穌曰。疇爲吾母。疇爲吾兄。顧羣弟子暨諸問道者曰。是非吾母吾兄弟乎。蓋承順在天我父之旨。卽吾

兄弟。吾姊妹。卽吾母也。

○耶穌此言。蓋示以道德爲神親者。視以血肉爲親。更獲主寵也。且聖母與諸

親屬。亦必因愛慕之德。大踰於人。方爲大主所親。非但因懷養吾主之身而已也。

播種喻

第九章

耶穌至海畔。郡邑人士雲集。乃登舟設喻曰。田者出矣。播其種。種或遺道傍。則受踐於人。食於鳥矣。或墮礮礫。根淺土薄。日出立槁矣。或落叢棘中。則覆蔽不長矣。惟播於沃壤者。則或一而穫三十焉。或六十焉。或百焉。復宣言曰。能悟者通之。羣弟子退。而請曰。曷時爲寓言諭人。顧我等亦不知也。耶穌曰。天國奧理。固宜與爾輩知之。若他人者。視亦不見。聽亦不聞。姑與之寓言。

云耳。爾輩得見得聞。可謂至幸。從古諸聖與先知者。欲見爾所見。不得見。欲聞爾所聞。不得聞也。今茲取譬。爾尙不達。則他諸喻何以達乎。夫種。天主之言也。播種。傳天主之道也。田者人心也。遺道傍踐踏且食者。聞天主之言。而被魔撓亂。志意不存者也。墮落礮礫立槁者。聞天主之言。亦喜受之。然立根不深。稍遇嫌阻。輒生厭也。蔽覆於叢棘者。既聞天主之言。又被世務貨財佚樂之念。蔓覆抑塞。不復勇猛前進也。惟播於沃壤者。聞天主之言。而蓄於至善之心。力行之。卽以含忍之德而結實也。但行之功效。多寡不一。故有三等之別焉。



甲 耶穌至海

畔，登舟設喻，

乙 都人士聞

耶穌至，雲集

聆教，

丙 耶穌喻在

田播種者，

丁 種遺道傍，

受人踐踏，并

為鳥啄，

戊 種落瘠土，

與礮磧間，

己 種於叢棘

者，

庚 沃田，

辛 種一穫三

十者，

壬 種一穫六

十者，

癸 種一穫百

者，



天國四喻 第十

章

耶穌又諭曰。天國如田。播種皆嘉穀也。有讐者潛播之以稂莠。佃者告於主人。請盡芟之。主人曰。不可。莠去則嘉穀隨之。姑俟其成。吾必命先斂稂莠。投諸烈焰。然後取嘉穀而登之廩也。又曰。天國如播種於田者。既播而任其滋生。迨成熟。主者始至以收斂之。又曰。何以譬天國。似乎芥實。其較諸蔬獨小。及其長發也。翹出諸蔬之上。枝幹扶疎。足栖戾天之鳥。又曰。天國如以酵發麪。今有麪數斛。以微酵投之。麪浹發焉。利用甚廣。

耶穌訓人。皆取邇言。

寓意。俟弟子有請。始明言之。蓋前聖豫訓。寓言啓口。闡明從古之秘奧。此其證也。

耶穌去。衆歸舍。宗徒

問稂莠之旨。耶穌曰。播種者人子也。田者人世也。嘉穀。善人。稂莠。惡人也。讐者。邪魔。收斂者。世界窮盡也。斂刈者。天神効命也。付烈焰者。入地獄也。登廩庾者。升天國也。惡人在獄。痛號切齒。善人在天。放光如日。能悟者悟之。



甲 耶穌在舟

中設喻

乙 邑人羣聆

主訓

丙 佃者攜嘉

穀

丁 轆人以稂

莠播田

戊 佃者以莠

示主

己 主人囑佃

者俟成熟後

再行分別

庚 收成時主

人命以稂莠

投烈焰以嘉

穀登倉廩

辛 藏穀之倉

廩

...

...

...

...

...

...

...

...

...



求天國三喻

第十章

耶穌曰。天國如重寶。藏於人之田。或窺其端。復覆藏之。不勝喜。必傾所有。購此田也。又如鬻寶者。偶見一美珠。必盡捐貲市之。又曰。天國如舉網得魚。必擇其嘉者納諸器。其不嘉者棄之淵。故世界窮盡。天神來別善惡二種。惡者悉畀之火。其痛苦哀號。有不忍聞焉。爾輩悉喻乎。皆曰唯唯。

晦迹本鄉

第十章

耶穌復還納雜勒故居。瞻禮日。講道如常。一日講經。至古聖依撒意亞所豫言。上主之神。與我偕焉。遣我爲曉諭貧乏者。醫療

痛裂其心者。爲榜諭已被擄者。必獲釋宥。瞽者必獲開目觀光。爲傳諭大赦之年。賞善罰惡之日云云。誦畢掩卷。付侍者曰。古經之言。今日驗矣。斯時衆注目耶穌而聳聽之。然未諭其爲眞主。相與私語。及所自出。曰。是某氏之子耳。若此大智靈蹟。從何得耶。耶穌曰。爾必欲我顯靈異事。如在葛發翁者乎。我實告爾。未有前聖而人不敬者。惟生於斯。長於斯。鄰里親族。未有能敬者也。耶穌竟不以靈異事。顯示此方。惟撫救數人病耳。爲此方人心多僞。而信不篤故也。維時陰謀加害。誘之出郭。臨高山之崖。擠墮深谷。耶穌無容遽害。稠人中往還。容與自如。



甲 耶穌復歸

納雜勒故居

乙 納雜勒城

丙 衆人講經

處

丁 依撒意亞

預言主與人

偕曉諭貧乏

於斯應驗

戊 開警釋擄

傳喻大赦之

年

己 僞心人引

耶穌至高山

欲擠墮深谷



聖與對對聖與

十

遣使傳教定規

第十章

耶穌遍行郡邑。廣布教化。乃見民衆如羊無牧者。心甚憫之。謂十二宗徒曰。穡事可穫者多。但收穫者寡矣。爾輩宜詢穡主命收之。其速往焉。第行必兩人俱也。復戒曰。爾且勿往異邦之鄉。但先救本國之民。失牧之羊。且諭以天國臨格甚邇。我授爾救病逐魔。及起死者之權。爾徒手受之。亦宜徒手與之。勿以錢貝實爾橐。勿以餼糧備久需。衣不可兼。履僅可護足底。柱杖可攜。彼工匠爲人力作。而人食之。爾爲人施教。有不得食者乎。凡入人邑。先問其可主者。旣入門。卽勿他適。且宜祝其家之安吉。倘

彼能承。則爾所求必庇之。不則爾所求亦必被於爾躬。其有不聽信。拒爾不容者。爾宜出其疆域。卽履間之塵。亦宜去勿曳也。蓋至審判之日。雖索多抹與惡木辣兩地人。尙亦寬之。獨此不容不聽教者之刑。必不少貸也。

索多抹惡木辣兩郡人。皆尙拂性男色。天主深惡其罪。曾降天

火燼燬其地與人。蓋甚言不容傳教者之刑。更當重也。



甲 耶穌憫憐

衆靈，遣徒傳

教，授以療疾

驅魔，及起死

之權，

乙 兩宗徒同

行，示傳教須

有伴，

丙 宗徒待命，

丁 宗徒結伴

前行，先救本

國人民，諭以

天國臨格，



諭宗徒傳道耐苦

第十四章

耶穌明知將來傳道之難。預堅宗徒之心曰。我遣爾四遊。若驅羊於豺狼中。爾宜智如蛇。馴如鴿。彼以爾教爲異。而執訊於官於君。爾勿預思論答。顧其時必有啟爾言者。蓋彼時所答。非爾輩自出。乃爾大父神告也。維時固有弟服爾教。兄異而訐之。子服爾教。父異而訐之者。蓋人之密邇。乃偏爲讐。第遭是冤苦。終不變志。方能自救耳。若此城迫。宜之他城。又曰。從來無勝師之徒。勝主之僕。但僕如主。徒如師。斯亦足矣。未有主遭辱於人。而僕免也。惟勿畏而已。又曰。爾勿畏能傷爾身。不能傷爾神者。夫

雀之微。非大父之命。亦不墮地。爾輩卽毛髮之數。大父紀之。爾勿懼焉。爾視羣雀。不尤貴乎。又曰。凡今向衆前認識我者。我將於吾父之前。亦云識彼。若今向衆前不認識我者。我將於吾父之前。亦云不識彼。凡重愛其生命者。正失其生命者也。若爲我失其生命。則得其生命者也。凡延接爾者。卽爲延接我。延接我者。卽爲延接遣我者也。我實告爾。凡以冷水一勺。遺茲小子。亦不失其報。宗徒如命。四巡諸郡邑。諭人悛改。隨處驅逐邪魔。傅油病人。皆獲救愈。



甲 耶穌念眾
 民遠來聞道
 曠野無食將
 五餅二魚剖
 授宗徒給眾
 乙 宗徒隨人
 所欲一一飽
 之
 丙 眾人奉命
 列坐計五千
 人婦孺猶未
 與也
 丁 宗徒歛所
 餘共十二筐
 戊 吾主獨入
 深山默用神
 工因知眾民
 感戴欲立為
 王故避之



五餅二魚餉五千人

第十章

宗徒還自郡邑。備以所行告耶穌。耶穌攜至僻所。少憩。又因追隨者衆。與宗徒登舟涉他所。諸郡邑人。或先遵陸。或先泛舟。並於水次迎焉。耶穌迄濟。與宗徒登山而坐。復下山誨衆。有疾病者。輒憐而救之。將夕。宗徒告曰。日云暮矣。况茲曠野。宜謝遣俾散村落。以就飲食。耶穌曰。無庸。當與以飲食。乃問斐理伯。斐理伯曰。今卽捐二百銀錢治具。不能飫多腹。况此地無可市者。諸德肋曰。惟一稚子。攜大麥餅五。魚二。然何濟於衆哉。耶穌曰。攜來。乃命宗徒諭衆列坐。或以百。或以五十。計五千餘人。而童婦

不與焉。耶穌取餅與魚。昂首向天。謝恩祝福。剖而授宗徒。宗徒隨人所欲多寡。遍給之。衆人飽飫。尙有餘者。耶穌命徹所餘勿失。宗徒斂之。計十二筐焉。衆見耶穌靈異若此。僉曰。是卽我等所望救世之主也。耶穌辭衆。命宗徒登舟。先往日擲撒地。獨入深山。默用神功。蓋知衆心感戴。將欲擁己爲君。故避之。

異哉。吾主全能矣。聖奧斯定曰。耶穌所行靈異諸蹟。一一足醒人心。令人繇其所見之事。推思所未見之主。蓋天主本體。自非人目可見。惟因其控制天地萬物之能。恍然見之。如數粒種之微。發生無量數。自非全能之功。曷克至此。但人因習

見忘其奇妙。故另顯異事。以驚人目。庶日用而不覺者。因此
異常事而豁然醒焉。夫吾主宰制天地之大。保養兆民之衆。
固更奇異於數餅餉數千人也。人不奇彼而奇斯。非斯奇勝
於彼奇。特稀見耳。緜思每日普養吾民者誰乎。豈非令地發
育。種一而穫十百者乎。故每日發生五穀百菓於田地者。卽
是日發無量數之糧於門徒手者也。造化之權。在吾主之手。
其五餅者猶種也。非種於地以生。乃造地者自命之倍常多
發也。美哉聖人之言。吾輩觀茲。可不仰天主變化之全能。并
感天主賜人日用之物乎。

天主降生言行紀畧卷之三終





甲 耶穌獨登山
巔，默用神工，

乙 眾民議立耶
穌為君，

丙 耶穌登山之
前，命宗徒登舟
泛海，

丁 夜分波濤大
作，舟幾覆，眾徒
驚甚，

戊 耶穌知徒危
甚，步海救之，

己 伯鐸羅受命
步海，因稍有疑
懼，幾至溺死，耶
穌援之，

庚 耶穌登舟，風
浪遂息，俄而濟，

辛 日擱撒城，諸
病人齊來求治，



天主降生言行紀畧卷之四

極西艾儒畧述

日擲撒步海聖蹟

第一章

耶穌抵暮。獨處山中。宗徒汎海。至夜分。風逆波濤大作。舟幾覆。耶穌知其危。乃步海而往。甫近舟。欲安之。而衆見履海者。大詫以爲妖影。驚悸高呼。耶穌曰。爾輩勿懼。是我也。伯鐸羅曰。倘是吾主。曷令我履海至彼。耶穌曰。來。伯鐸羅躍入海中。如步平原。旋見風濤洶湧。轉念少疑。身卽將溺。復號耶穌拯救。耶穌以手援之。曰。小信人哉。疑何爲。舟人復乞耶穌登舟。既登。風浪遂息。

衆叩首耶穌足前曰。爾眞天主子也。俄而濟。乃日擲撒之地。此
方人皆識耶穌。互相傳報。而諸疾病之人。填衢求療。得撫耶穌
之衣。無弗立愈。





中 耶穌手攜聖體聖爵預許以己體血爲人真糧。

甲 古聖亞巴郎受默基瑟得之餅酒并受其祝福此爲聖體預像。

乙 主民出陔日多時食羔羊此爲建定聖體預像。

丙 主民往探福地將葡萄採歸此表彌撒中以葡萄酒成聖血。

丁 先知厄里亞食天神所送餅水力量頓增此爲領聖體預像。



論天糧指已聖體

第二章

詰朝衆往海畔訪耶穌不見。又知昨不與宗徒同舟。正相憶間。適有他舟泊岸。皆就而渡。至葛發翁城覓之。卽遇諸塗。曰。吾師何時至此。耶穌謂衆曰。爾來訪我。特因昨飽飫而來也。爾勿務得與時俱盡之食。宜務得永久不匱之糧。人子者將與焉。亦大父之命與爾也。衆曰。不識何以得之。曰。信於大父所遣者。是矣。衆曰。有何奇證。啟我信乎。昔者我輩之祖。獲食瑪納於野中。瑪納者上古梅瑟時。從天降下。狀類米麥。取食可當眾味。蓋古經有云。糧自天降以與之食。顧未審此外尙有可食者否。耶穌曰。我實語爾。夫非梅瑟與爾自

天之糧。乃今吾父錫爾眞糧。自天降而活人世者也。僉曰。吾主時賜我是糧足矣。耶穌曰。我卽生命之糧。奉我不饑。信我不渴。我嘗與爾輩言。爾旣聞且見。奈何弗信。吁。凡父所付我者。必親就我。就我者。我必不麾之去。蓋我自天降來。非自行吾旨。乃行遣我者之旨耳。大父遣我之旨。欲我勿失其所付於我者。又欲我於世盡日。賜之復活也。且欲世人凡有見其子而信者。皆與之常生也。衆訝耶穌所云。吾乃眞糧自天而降者。相向曰。此耶穌若瑟之子。吾識其父母者也。何云眞糧自天降乎。耶穌曰。爾勿相疑。非我父啓祐者。不能就我。就而信我者。必得常生。爾祖

雖食瑪納亦不免死。若茲眞糧人能食之。卽不死矣。我乃自天降來活糧也。此活糧卽我之身體。盡活世命者是。如德亞國人。不解。爭曰。何能以己之身體。充我輩食哉。耶穌曰。若爾輩不食人子之體與血。則罔有生命矣。食我體。飲我血。乃得常生。我日後必復活之。蓋我體爲眞糧。我血爲眞飲。故飲食之者。則我與之偕。彼亦與我偕焉。兩無間隔。猶父遣我。我固因父而生。則食我者。亦因我而生也。此乃自天之糧也。聞者實不能通。耶穌又曰。爾勿異斯言。他日見人子上升於原所。則知其爲何如矣。夫物之生命。神也。肉乃物而無用者。故我與爾輩所言者神也。乃

生命也。但爾輩有未信者。故先有言。苟非我父所與。則不能近我信我耳。衆愈不解。有他適流散者。耶穌因謂十二徒曰。爾輩亦欲去乎。伯鐸羅對曰。我輩何適。爾有常生之言。我輩知之。實信爾爲契利斯督天子也。又何適。耶穌曰。我願擇爾十二人。

然中尙有一魔焉。

蓋指茹達斯日後背耶穌者也。聖體事。詳見七卷三章。



甲 耶穌面責

異學士之非

因其徒循虛

禮妄議無辜

乙 宗徒求解

主訓

丙 異學士輕

議宗徒、不守

長老之禮、既

聆主訓、尤不

知過、

論污潔

第三

耶穌在加理勒亞。異學士輩。及諸胥吏之流。來自都城者。趨謁。

偶見宗徒未盥手而飯。心竊非之。

彼俗所傳。不盥手不食。過市并非沐浴不食。凡盤盂瓶壺

臥榻諸具。必先加潔除。然後用之。

乃語耶穌曰。爾徒奚不守長老之禮。未盥而

飯。耶穌曰。爾曹何因長老禮。反違上主命乎。天主命人孝敬父母。苟詈焉。罪至死。爾將以孝敬父母不足論。惟孝敬於爾足矣。苟循爾禮。將不虛上主旨耶。古聖者依撒意亞。嘗有言。極當於爾。其謂斯民也。惟以口舌尊我。衷則遠我。惟以人學相傳。徒然敬我矣。復集衆而語之曰。爾輩聽我言。能通之乎。夫非從口入

者能汚人。乃從口出者能汚人也。宗徒卽耶穌曰。彼學士輩聞斯言。未克自知其非。反遽以爲迂誕矣。耶穌曰。夫木也。非大父所植。必被拔也。直任之耳。是矇也。以矇相矇。兩人俱陷。耶穌退息。伯鐸羅偕諸宗徒。復求解汚人之言。耶穌曰。爾亦無識耶。飲與食。豈能汚人。飲食自外入。不關於心。一經內腑。卽穢而下矣。凡殺人。邪淫。竊盜。妄證。慳吝。奸詐。驕傲。種種惡念。皆繇內出。如是者能汚人也。若但不盥手而食。何汚之有。



甲 耶穌至底
落暨西團境
中

乙 外方婦人
加納搗亞瑟
主憐恤、謂厥
女寤於魔、

丙 宗徒代為
請求、

丁 婦人俯拜
主前、求主救
治、

戊 耶穌言子
之食、不可投
於犬、

己 耶穌因婦
人之信、允許
所求、



底落聖蹟


第四
章

耶穌歷底落及西園二地。避跡不欲人知。適有方外婦人。加納
擲亞者。其女被魔。聞耶穌至。卽俯伏號懇曰。吾主達未之子。憐
恤我。我女甚窘於魔。願驅之。耶穌不應。復祈不已。宗徒乃代爲
請曰。願發示。免其頻呼聒耳也。耶穌曰。我只來救本地迷羣耳。
婦又前俯拜。求曰。吾主救我。耶穌曰。豈可以己子之食投於狗。
婦人應之曰。斯亦可爾。主人有遺。狗必食之。耶穌曰。爾信大矣。
因爾之信。許爾所求。爾女之魔去矣。婦歸。魔已去。女愈。

加理勒亞聖蹟

第五

出底落。至西園。道經加理勒亞海濱。有瘖而聾者。衆求爲開豁。
耶穌挈至靜處。以指點其耳。液點其舌。乃仰天哀歎而呼曰。厄
弗達。譯言開也。瘖聾者。卽能聽能言矣。復戒之曰。勿告人。其人不能
默。愈用以告。耶穌登山坐。衆多以殘疾人投足下。耶穌一一愈
之。於是諸人見聾者聽。瘖者言。瞽者見。跛者走。一切神效。競讚
大主之恩。



甲 耶穌經加

理勒亞海濱、

有瘡而聖者、

眾人代求療

治、

乙 耶穌擊至

靜處、指點其

耳、

丙 耶穌以液

點其舌、

丁 耶穌仰天

哀嘆、命開豁、

病者即能語

聽、



七餅數魚給數千人

第六
章

是時衆見耶穌療諸疾異能。從隨彌殷而乏食。吾主謂其徒曰。余憫斯衆遠來。三日從遊無食。弟子曰。曠野中。從何得糧。以飽斯衆哉。耶穌曰。糧幾何。曰。僅七餅。及些小魚耳。耶穌命衆席地而坐。取餅及魚。謝恩。剖而授諸徒。遍給之。衆得飽焉。命收其餘。得七筐。食者凡四千人。

諭宗徒防異端

第七
章

耶穌辭衆。同宗徒登舟。往馬日但。發利塞俄及撒杜。則俄二黨就耶穌。求見自天之証。吾主深歎其不醒曰。爾求證。我實與爾言。無他證。惟以若納爲證耳。

詳見前

復辭衆登舟而渡。門徒忘攜

糧。耶穌戒衆弟子曰。爾切宜防發利塞俄及撒杜。則俄二黨之酵。宗徒受命。因念未齋餽糧。耶穌知其意。復謂曰。爾何信之小哉。而慮及餽糧乎。曷不思曩於野中乏食。我以五餅二魚。飽五千餘衆。尙餘幾何。衆對曰。餘十二筐。又曰。適因絕糧。而我以餅與魚。又餉四千餘人。所餘幾何。曰。七筐。曰。何爲不醒而惛惛若

是耶。我所謂。非指食也。衆乃覺耶穌之語。喻發利塞俄不正之學也。



伯撒依達救瞽

第八
章

伯撒依達之岸。有瞽者。或攜之來。乞耶穌點之。耶穌引至市外僻所。取口液傅其目。而詢之曰。爾能見否。答曰。第見人如樹木之動。復手撫之。其目瞭然。戒之曰。爾歸。慎勿語人。



戊



巳



庚



甲

丁

丁

丙

甲 耶穌祝福於徒、付赦罪之權、

乙 開天門之鑰、即赦罪之權、

丙 伯鐸羅首受此鑰、他徒亦隨之而受、

丁 諸宗徒蒙籠、通達經典奧旨、

戊 領洗聖事、

己 告解聖事、

庚 終傳聖事、



真言受戒書

卷之五

預言受難復活

第九章

如德亞國王黑落得聞耶穌種種異跡。心殊懸仰而欲見之。時耶穌已往則撒勒亞。謂宗徒曰。世人有何擬議於人子者。宗徒曰。人或以為若翰復生而行異事。或以為厄利亞。

古聖人名

見世。或

以為古先知者重來也。耶穌曰。爾等云何。伯鐸曰。爾乃正為契利斯督天主子也。耶穌曰。噫。爾幸甚。蓋此非人示爾。乃在天我父默示爾者。我亦謂爾。正是白德臘。

白德臘。西文音石。近伯鐸羅。故借指之。

卽

於斯石上。將建吾教會。魔力莫能搖。又將托爾天國之鑰。以司啟闔。凡罪之解救。皆係爾之容否也。蓋付聖伯鐸。及後諸司

教者。代爲釋罪之權。卽定告解之禮也。更戒宗徒。勿向人謂我
是契利斯督。蓋人子欲往協露撒稜受多窘辱。以至被釘十字
架而死。然不三日。必復活也。伯鐸羅聞言。愕然阻之曰。吾主。何
可如此。耶穌顧之曰。娑殫去。爾無味於天主之事。惟識世人情
味耳。娑殫。譯言魔也。狂誕也。嚴責其相阻受難救世之旨也。復聚宗徒。及衆人諭之曰。凡

欲從我。先須拂己私。日負己之十字架以從也。蓋欲保其性命
者。必失之。若爲我爲道而失之。斯則保之矣。試令得四海之富。
天下之廣。而損其靈神。是爲何益。顧宇宙內。何者可易我靈神
乎。



甲 耶穌在大博
 爾山祈禱，聖容
 發光若日，衣白
 如雪。
 乙 古先知梅瑟、
 厄利亞、
 丙 三徒見主榮
 光，喜不自禁。
 丁 天主聖父聲
 言，此乃我愛子，
 爾輩宜聽之。
 戊 天神攜二聖，
 仍歸原所。
 己 耶穌與宗徒
 下山，戒勿聲張。
 庚 耶穌下山，人
 民咸望而拜。
 辛 一子被聾啞
 邪魔所困，耶穌
 愈之。



大博爾山顯聖容 第十

章

耶穌既示受難之事。越六日。攜伯羅鐸雅各伯若望三徒登大

博爾高山。默用神功。餘衆皆在山麓。

山在加里勒亞

三徒倦臥而睡。忽

睹耶穌聖容。發光若日。披服皓潔如雪。正天上景象。又見梅瑟

厄利亞兩先聖與耶穌相語。將行最上之事。

指受難救世

伯鐸羅喜

告耶穌曰。此間樂矣。吾主倘許可。請製三幕。一居吾主。一居梅

瑟。一居厄利亞。語未畢。白雲遶護左右。隨聞空中有聲曰。是乃

我愛子。爾輩宜聽之。三徒咸凜凜俯伏。耶穌以手提之曰。爾起

毋恐。三徒仰首。獨見耶穌。不見兩先聖矣。耶穌復與下山。戒曰。

茲所見所聞。未至人子復活時。毋出爾口。三徒隱不敢洩。然私

議莫解復活之旨也。

吾主耶穌既以受難之事。屢示宗徒。茲欲少慰之。故顯其聖容。微露天國永福端倪。

是時梅瑟尚在靈薄處。靈薄者。地中古聖靈魂所居安樂之處。暫候天主降世。然後同升也。厄利亞。今不知何在。惟知其尚未升天。亦未去世。當日往見耶穌。厥後復歸原所。

下山驅魔再言受難復活

第十章

耶穌出山。山麓人士咸望而拜。中有一人俯伏耶穌足前。祈救其子。謂其被魔虐甚。或迫入水火。或於腹中左右擊。或壓如重負。或切齒有聲。或禁其聲。令瘖。宗徒曾爲驅之。不能去。故復懇於耶穌。耶穌知其人信心不堅。歎曰。惡類之人。胡不我信。我在爾衆中。幾何時耶。含忍爾衆。又幾何時耶。乃命攜其子來。其人攜子造耶穌前投地。口沫流出。耶穌問其父曰。爾子何日遭魔。曰。自幼遭此。若果能救。乞憐救我也。耶穌曰。爾能信。無所不可。其人墮淚大號曰。我主。我固信矣。願更堅我信。補所不及也。耶

耶穌謂魔曰。聾啞邪魔。我命爾去。勿再入此人腹。其魔復作虐良久。大呼而去。穉子困極似死者。耶穌手提起之。衆退。宗徒問曰。我輩何爲不能去此魔。耶穌曰。爲爾輩信之不全也。我實與爾言。若有信如芥實焉。則命山他移。固無不能矣。此魔非用默禱及齋。不能去。復巡加理勒亞地。再告宗徒以受難事。曰。人子者。將爲人所負。被害至死。死之後。三日復活。宗徒聞而憂形於色。不解其故。亦不敢復問。

魚口取錢完稅

第十章
第二章

耶穌往葛發翁城。有司計人索錢。向伯鐸羅曰。爾師不納錢乎。應之曰。納。耶穌抵舍。謂伯鐸羅曰。國稅索何人。本地人乎。抑異方人乎。伯鐸羅曰。異方人。耶穌曰。如是。則人子不必納矣。雖然。我亦不欲違。以免彼疑議焉。爾往釣於海。首獲之魚。其口有錢。可取以納我爾稅。伯鐸羅如命往釣。果獲魚口錢。納之。

噫。吾主耶穌真

天主子。人律所不能拘者。但欲示人。國法不可輕違。故亦如是。然命取首獲魚口之錢。復見吾主全能。故雖服人之令。以納。又顯其全知大德。以化物也。

抱孩論謙

第十
三章

諸宗徒見耶穌獨命伯鐸羅納稅。相與言曰。吾儕孰爲長。又問耶穌曰。天國中孰爲大。耶穌知衆意。坐而懷抱一孩。語宗徒曰。爾輩若不化爲孩。必不入天國。有人謙微如孩。是於天國爲大者也。若人以不善機陷一小子信於我者。宜以磨石繫其頸。投諸海。爾勿忽易孩提。彼之護守天神。常對越在天我父也。時宗徒若望向耶穌曰。吾師。余輩嘗見因爾之名。而去魔者。爲其不偕我遊。故禁止之。耶穌曰。毋禁。因我名而行靈事者。必不能卽誹我也。且凡不爾敵者。卽與爾者也。



甲 耶穌懷抱

一孩、示人謙

下若孩、於天

國爲大、

乙 諸宗徒、

丙 耶穌懷抱

孩童、

丁 兄弟之一、

獲罪於爾、宜

先迪之、

戊 兄弟若弗

聽、宜益二三

友、偕往勸之、

己 若又弗聽、

則告於教會、





甲 耶穌所喻
世主、

乙 負債數萬
者、

丙 有臣百錢
之僕、

丁 負者乞赦
不得、遂拘於
獄、

戊 同察之臣、
忿告於君、

己 君怒、召臣
責之、

庚 耶穌親奮、
勸往都城、望
其顯行異跡、



論赦人罪債 第十四章

耶穌又語衆曰。凡兄弟獲罪於爾。爾宜先私迪之。若聽。則爾獲

一兄弟矣。若弗聽。宜益二三五友朋爲證。偕往迪之。又弗聽。則告

於教堂。又弗聽。乃直視爲教外異端而絕交。欲令其慚悔改圖。伯鐸羅

進而請曰。若人獲罪於我。我宥容之。限止七乎。耶穌曰。豈惟七

哉。卽七十有七。未可限也。此總論人罪也。然獨揭獲罪於我一端。人所更難赦者。以指若果痛悔。無

罪不可赦。令其自新。蓋必如是。方可蒙宥己身之罪也。蓋天國於人。譬世主於諸臣。誅債

或負數萬無可償者。其臣惶懼無計。俯伏哀懇。君憐而悉贖之。

及出門。逢負彼百鍰者。扼其項。索償不已。負者伏罪祈寬。復不

赦。付獄迫迫。同列見之。忿告於君。君怒。召而責之曰。惡吏。我赦爾數萬。爾不赦數鍰耶。因窘辱置之獄。徵責不少貸。夫爾不真心救人如是。在天我父之待爾亦如是。





甲 耶穌道出

撒瑪利亞先
遣二徒入城
以備所需、

乙 撒瑪利亞
城、

丙 十癩人侍
立道旁、高聲

求治、耶穌許
之、命其往見
司鐸、疾即脫、

丁 爲撒瑪利

亞人卽十癩
之一、跪伏耶
穌足下伸謝

主恩、

戊 耶穌嘉癩
者知恩、



撒麻利亞愈十癩

第十章
五章

耶穌於加理勒亞。值瞻禮日。親舊勸往都城。意欲耶穌顯靈異於衆人耳目也。耶穌曰。我之時尚未屆。乃令親舊先往。已後之諸瞻禮人士。皆私語曰。不知其來也。竟何似。遂相與伺之。耶穌經撒麻利亞。先遣使者入城。以備所需。地人無容入城。雅各伯及若望二宗徒不悅。向耶穌請曰。願許吾輩。命天火降而燼斯城人乎。耶穌顧責之曰。爾曹不自知爲何心人。人子不降世以害人。實以救人也。乃往他邑。塗次。有患癩者十人。聚而待耶穌。望見大呼曰。耶穌吾師。矜憐救我。耶穌曰。爾宜往見司教鐸德。

皆唯而行。行間疾已脫矣。中有外方一人。返伏感謝。耶穌曰。適
十人並愈。今九人安在。噫。何不返頌謝主恩。豈獨此外方之人。
乃知恩耶。顧其人曰。爾起且去。以爾信。許爾身愈。





甲 如德亞人、

遍索耶穌、

乙 耶穌於禮

期將半、升堂

施誨、

丙 耶穌在堂

誨人、

丁 法利塞俄

以耶穌理學

深奧、見而奇

之、

戊 耶穌言梅

瑟所貽教法、

學士未能遵

守、

己 法利塞俄

見耶穌禮日

療病、甚憾之、



難期未至反化捕者

第十章
六章

都城瞻禮初期。

時連七日皆瞻禮
此乃其始日也。

如德亞人士。遍索耶穌不獲。

紛然議之。瞻禮將半。耶穌始升堂誨人。衆又奇其理學深奧。謂

從來未攻文字。何自得之。耶穌曰。我之學非我自有。乃遣我者

諭之耳。有能承遣我者之旨。則知此學從上主出耶。抑我自有

耶。夫自言其言者。意欲自揚也。若有發言而揚天主者。其言必

眞。其行必無非義也。又曰。梅瑟不貽爾教法乎。爾未能守。而反

欲害我。爲我於瞻禮日療人疾也。或曰。是非所索欲害者乎。茲

已公言於此矣。何竟無一人對耶。抑或彼尊者。知爲契利斯督

歟。又有信從耶穌者相謂曰。契利斯督降來。寧過是乎。發利塞俄見耶穌在。遣壯士來捕。時耶穌所定受難之期未至。壯士既聞耶穌訓。咸感不忍。耶穌乃於瞻禮之末日曰。我與爾偕。不能久矣。將歸於遣我者。爾輩必將索我而不得。我所往。爾輩不能詣焉。又宣言曰。渴者宜親我而飲。信我者。則於經有驗也。經云。活水溢於其腹。蓋指後人信從聖教者將受聖神。得寵祐之效也。衆聞耶穌超論。有謂真是玻羅弗大聖者。有謂真是契利斯督者。壯士返。發利塞俄詰之曰。胡不獲耶。答曰。從未有如彼講論發人心志者。發利塞俄曰。爾亦被其誘矣。詈之。時有尼閣得



甲 衆人瞻禮之所、

乙 信耶穌之人、

丙 法利塞俄輩見耶穌而曰、是非欲害者乎、

丁 法利塞俄遣壯士捕耶穌、

戊 壯士復命法利塞俄大遭詰問、

聖人準

聖人準
其教如
此也

衆善不合而

未終其於前百誠福其人者平發其冰如皇士封爾亦誠無

同歸於準無及遠凡假歸聖會各歸衆自善則其亦未聞其



睦初從耶穌受教。乃如德亞尊者。謂衆曰。吾儕豈有未聞其言。未察其行。而可臆斷其人者乎。發利塞俄學士曰。爾亦加理勒亞人耶。

加理勒亞。乃耶穌講道之處。此方人多信者。故云。

衆議不合而散。



反難異端赦罪婦 第十
七章

耶穌往阿利丸多山。次日復詣聖殿誨衆。發利塞俄輩欲難耶穌。故以一婦犯淫者送殿中。問耶穌曰。此婦按梅瑟教法。當擲石殺之。請判之。蓋惡黨之意。謂若言宜死。則可議其不仁。若言宜寬。則可議其不遵教法。耶穌弗應。惟俯躬以指書地。衆迫其斷。耶穌曰。爾輩中自信無罪者。首擊此人可也。衆聞言。各明知所犯諸罪。自老宿以下。默然皆散。耶穌起謂婦曰。適愬爾者安在。曾有定爾罪者乎。婦人應聲稱曰。吾主。未有定我罪者。耶穌曰。我亦不定爾罪。爾去。此後勿再犯耳。



甲 都城聖殿、

乙 淫婦被法、

利塞俄拿送

耶穌、請判其

罪、

丙 耶穌俯躬

書地、

丁 法利塞俄

催斷淫罪、聞

耶穌言、默然

而散、





甲 控訴淫婦
之人皆逸去、
耶穌謂婦曰、
我亦不足爾
罪、惟此後慎
勿再犯、

乙 耶穌在殿、
自稱天地之
光、從者不履
幽暗、

丙 耶穌語人
曰、凡有所斷、
非我獨斷、乃
與大父同斷、
云、

丁 法利塞俄
問耶穌、爾父
安在、

戊 在堂之姪
德亞人、

父又曰其對交論并來拜不拜爾等津負重累而派矣其派

亦即視曰爾不備乃爾下爾非之父或謂爾等如爾等之

必其爾人其備有... 其以并之父其來曰爾父

似不然然對其曰... 其以并之父其來曰爾父

其以并之父其來曰爾父... 其以并之父其來曰爾父

其以并之父其來曰爾父... 其以并之父其來曰爾父

其以并之父其來曰爾父... 其以并之父其來曰爾父

其以并之父其來曰爾父... 其以并之父其來曰爾父

其以并之父其來曰爾父... 其以并之父其來曰爾父



自證眞主

第十
八章

耶穌於聖殿中語人曰。我乃天地之光。從我者不履幽暗。有生命之光焉。發利塞俄誚之曰。以此言爲己證耶。以己證己。證恐不眞。耶穌曰。雖然。我以己證。無不眞也。我能知所從來。則知所從去矣。顧爾輩不知我之來。亦不知我之去。爾以形迹斷人。我則不然。若使我斷。斷必眞。蓋非我獨斷。乃與大父同斷也。爾曹之教。兩人共證者乃眞。我以己證。亦以我之父證。衆曰。爾父安在。耶穌曰。爾不識我。則不識我之父。若能識我。或能識我之父矣。又曰。我往矣。爾後索我不得。爾必將負重罪而死矣。我所往。

爾必不能來。往之日。指升天也。

如德亞人疑曰。彼其欲遠逝。或欲自引

決乎。耶穌又曰。爾從下域。我從上域。爾從世。我非從世也。我已

爲爾言。爾必負罪而死。蓋爾不信我。必負罪死。衆問曰。子爲誰。

耶穌曰。始

始者。經中指天主爲萬物之元始也。

與爾話者。蓋耶穌所指大父。乃天

主。能德肋。衆不悟也。耶穌又曰。爾輩舉揚人子時。

指釘在十字架上。

乃

知之。知我非有爲。惟因父所諭而諭耳。遣我者與我偕焉。我常常順其旨而行之。

按聖經。世人常生眞福。一在識天地眞主。欽崇無怠。一在知降生救贖之恩。深心感法。二者缺一。不得享眞福。而必罹永



甲 都城聖殿
 乙 耶穌語衆
 曰我往矣爾
 索我不得矣
 丙 爲如德亞
 人疑耶穌非
 遠行卽自盡
 丁 耶穌言我
 所往爾不能
 來此指升天
 戊 耶穌言爾
 負重罪而死
 此指下獄
 己 耶穌向衆
 曰爾輩舉人
 子時乃知我
 所行是承我
 父之旨此指
 受難復活

誠不逾編籍黃

寧世不忠孝也哉

無非將以亂人

之罪其罪則非學士之類且

其誦聖書然也昔主聖補萬民之大者父母自當其欲其子

忠之謂是吾嘗聞以忠氣集爲之之樂矣與子蓋其各受

厥誓之聖年不編焉其性父則以竊無繇而受其心謀豈不



殃。譬之臣子。不識敬其君父。則恩寵無繇而受。反必將蒙不忠之罰。故君責臣以忠。原非爲己之榮。欲使臣子盡其分。受其福。理當然也。吾主耶穌萬民之大君父也。自證其爲眞主。無非欲以增人之福。而免衆人之罪耳。嗚呼。彼學士之傲且妬。不能識認眞主而恪奉之。其罪寧止不忠孝也哉。

有罪者爲罪之役

第十章

此時衆聞耶穌之言。亦多信從。耶穌語衆曰。爾能存我言而行

之。則爲我徒。卽將識眞。

卽眞主也。亦耶穌所傳眞教也。

惟眞也者。必贖爾。

卽贖免其

罪也。衆曰。吾儕乃亞罷郎之裔。未嘗鬻爲人奴。何贖之有。耶穌曰。

我實告爾。凡犯罪者爲罪之奴。若有爲爾贖者。則爾免爲奴矣。

我知爾爲亞罷郎之裔。旣爲其裔。則當法其所爲。今我所語爾

者。皆眞實言。是我所聞於天主者也。乃爾曹有不受我言。而欲

害我者。此豈亞罷郎所爲乎。爾輩惟行爾父之所行。僉曰。吾輩

惟以天主爲父矣。耶穌曰。以天主爲爾父。必愛我也。我繇天主

而來也。今何不識我之言乎。爾輩不能聽我之言。故知爾輩以
魔爲父。且欲行爾父之所欲。魔所欲。惟嗜殺人。務誑誕。是爲誑
誕父。我言眞實。爾反不信。爾曹能證我一罪乎。我言旣眞。何爲
不信。凡繇天主教者。必聽天主之言。爾輩不聽。是不繇天主教矣。耶
穌復曰。有能守我言而行之者。則永不死矣。衆曰。亞罷郎與前
聖皆死矣。守爾言而行。胡得不死。爾自謂勝於亞罷郎之聖。爾
誰乎。耶穌曰。若我自尊榮。則尊榮非我有也。自有尊榮我者。罷
德肋在。卽爾輩所稱之大主。爾實不識。惟我識之。卽爾祖亞罷
郎亦踴躍仰望於我。願見我有是日也。得見而心悅矣。衆曰。爾

年未艾。安得見亞罷郎。耶穌曰。亞罷郎未生之先。我已在矣。衆
不悅。欲取石擊之。耶穌乃出殿外。姑遜避。





甲 衆人聞耶

蘇言，羣相信

從，

乙 瞻禮講道

處，

丙 天主聖父，

示耶穌由天

主來，

丁 法、利、塞、俄

及衆人，

戊 不悅耶穌

言者，欲取石

以擊，



三 聖 主 天

胎瞽得明證主

第二章
十章

耶穌行次。有胎瞽而乞者。宗徒問曰。斯父母之罪歟。抑斯人之罪歟。耶穌曰。非斯人之罪。亦非其父母之罪。是將顯天主之全能耳。晝光未盡。我宜爲斯人行遣我者之一效。

所云遣我者。即天主父也。

夜

至則不可得而行矣。我處世。卽照世之光也。語畢。以液和土。抹其目。命之曰。爾往就西落陁水洗之。瞽如命往洗。豁然明矣。歸見者僉曰。此非向日乞人乎。或曰是也。或曰非是。似耳。乞人曰。是我也。衆問知其故。曰。今安在。乞者曰。不知。衆以乞者送發利塞俄。謂耶穌和土療瞽。不當行於瞻禮日。發利塞俄曰。不守瞻

禮日者。非從天主之人也。或曰。如有罪之人。安能爲此。衆論未決。問乞人曰。爾何以斷斯人。答曰。以我斷之。則大聖也。發利塞俄不信。乃詢其父母曰。是爾子乎。胎瞽何以得明。父母曰。我知其爲我子。我知其胎瞽。今日得明之繇。則我不知。彼能自道矣。蓋發利塞俄輩共計。若言耶穌是契利斯督。卽共擯之。乞人父母畏其黨。故諉之子。發利塞俄又問乞人曰。爾當欽崇天主。以實告我。我知彼罪人也。乞者曰。彼有罪無罪。吾不知。惟知前瞽而令明矣。衆又曰。彼何以療爾。答曰。我旣言矣。爾旣聞矣。何又問。爾輩或欲爲其徒乎。衆誓曰。汝乃其徒。我則梅瑟之徒。我所

知。乃天主語梅瑟者。若彼則不知其所言所行。從何而有也。乞
人曰。正緣爾不及知。始見耶穌奇妙。能開我瞽者也。吾聞建奇
事者。必稟於天主。天主不遂有罪者之請。惟欽崇天主旨。乃遂
其求。世豈有能開胎瞽者哉。不繇天主。不能有此。衆復詈曰。爾
自生來。渾身是罪。而乃欲誨我乎。遂呵出。耶穌聞衆斥之。念既
開其肉目。又欲開其神目。復於途問之曰。爾信天主子否。對曰。
孰爲天主子。俾吾可信乎。耶穌曰。頃與爾見。茲與爾言者是矣。
遂稱曰。吾主我信。卽伏地拜焉。耶穌曰。我降人世間。使瞽者得

見。而見者爲瞽矣。


吾主非欲世人蒙蔽。但彼學士自恃其學。自
是其見。不虛心受訓。故不能明真理。不如良

善之士。謙抑虛衷。
以領教益。故云。

發利塞俄輩問曰。吾輩無乃爲瞽乎。耶穌曰。

若爾輩爲瞽者。則無罪矣。因自謂明見者。故爾罪難免耳。





甲 宗徒途遇胎警，問誰過致此。
 乙 耶穌以液和土。
 丙 耶穌搏土拭警者之目，命往西落陀池一洗。
 丁 警者得明，聲言已是胎警。
 戊 乞人之父母。
 己 乞人再證於法利塞俄前，謂己前警而今明，因耶穌之能。
 庚 乞人伏拜耶穌，前信為天主子。

牧羊喻

第二十章

耶穌曰。告爾曹。今有綿羊棧於此。入者繇垣。不繇門。穿窬哉。繇其門。是必牧者。司門者。啟扃納之。羊聞聲必聽命。導之出則隨。習其聲故耳。若他人來。不惟不相隨。且避之矣。未習故也。衆不解。耶穌復語之曰。實爲爾言。我卽棧之門也。向來之人。繇垣入。寇之徒也。羊不聽其命。望我門而入。生命獲濟焉。

又曰。我乃善牧。善牧者。且爲羊致命不辭也。狼猝至。他傭舍羊而遁。以羊非己物也。狼乃得恣焉。若我則能識羊。羊亦識我。卽爲羊致命。甘之矣。尙有他羊。未入此羣。我當收引。其必聽吾言。

共成一棧。而以一牧牧之。



天主降生言行紀畧卷之四終

天主降生言行紀畧卷之五

極西艾儒畧述

七十二徒行教復命得訓

第一章

耶穌於十二宗徒之外。復選七十二徒。耦而遣之。先往於所將詣諸方。其傳道之規。亦如命宗徒焉。復曰。聽爾者。聽我也。輕褻爾者。卽輕褻我也。褻我者。卽褻遣我者也。七十二徒遍行郡邑。反命喜曰。彼中卽有邪魔。因爾之名。胥服於我。耶穌曰。我曾見之。顧汝不可因此生喜悅心。第因汝名列於天冊。爲主簡閱者。則喜悅可也。此時耶穌仰首似欣躍然。曰。謝爾大父。天地萬物

之主。乃以斯道遮隔於聰慧。而披示於謙遜者。父之旨如此。誠然也。顧萬物之權。父與我矣。莫知子者。知之者惟父。莫知父者。知之者惟子。及子所啟之人。又曰。凡負重及困苦者。宜趨就我。我能釋之慰之。又曰。汝曹宜負我之軛。宜學我之良善謙抑。汝心方得寧矣。我軛甚易。我任甚輕矣哉。



甲 文學士問
耶穌何修而
得常生、

乙 葉利閣城
行人往葉
利閣中道遇

寇、

丁 撒責爾鐸
德、

戊 勒未達副
祭、

己 受傷之人
臥地垂斃、

庚 撒瑪利亞
人撫慰受傷
之人、

辛 以所乘馬
掖傷者至逆
旅、囑寓主調
治、



論愛人

第二章

有文士問耶穌曰。吾何修而得常生乎。耶穌曰。爾嘗習經。經云何。士曰。經云。宜盡其心思神力。以愛慕天主。及愛密邇我者。如自愛也。耶穌曰。善哉。如是而行。卽得常生之道矣。士復問曰。孰

爲密邇者乎。

彼中解斯語者有曰。密邇者。止言本國人也。有曰。止言有道德者。有曰。止言親友者。故作不知其解

而發問如此

耶穌指一事以曉之曰。人有自協露撒稜往葉利閣者。

中道遇寇。掠其貲。傷之。垂死。適有撒責耳鐸德。

司祭品職

過而視之。

去。又有勒未達者。

副祭品職

過而視之。亦去。後有異邦撒瑪利亞之

人。過視而心憐之。用酒油爲洗其創。用藥敷之。載以所乘馬。掖

至逆旅。界主人銀錢二。囑之曰。善爲我加意調護。不給。俟回日復繼焉。此三者。孰爲密邇乎。士曰。憐者是。耶穌曰。爾如此而行可也。蓋指凡需我者。不問親疎賢否。槩當以密邇視之。而振救之耳。





甲 耶穌道經

伯大尼亞地、

有兄妹三人、

迎至其家、

乙 瑪大勒納、

伏主足下、忻

領聖訓、

丙 瑪而大勿

遽治席、怨其

妹不助、

丁 隨耶穌之

門徒、



賢女延主得訓

第三
章

耶穌道經伯大尼亞地。有瑪而大與兄妹三人。恭迎至家。幼妹瑪大勒納俯謁聽講不倦。瑪而大急治席。不勝煩迫。苦其妹不一助之。語耶穌曰。吾主不念我之獨力。而令妹助我一臂乎。耶穌頻呼曰。瑪而大。瑪而大。汝太迫於多營。所需者一而已矣。弗如汝妹擇其最善者。得務於永永莫奪之功。蓋示瑪大勒納專心承主訓。勝於勤外務以事主也。

論禱主

第四
章

耶穌嘗於靜處默禱。既畢。有弟子請曰。願吾主教余默禱。如若

翰初誨其徒者。耶穌曰。汝欲祈禱。宜誦曰。大父。我願爾名見聖。爾國臨格。願今日與我。我日用糧。爾免我罪。如我亦免凡負我者。又不我許陷於誘惑。乃救我於兇惡也。耶穌又曰。有深夜叩友之門。求糧糗以餉遠來客者。彼友已就寢。曰。我門已扃。擁兒寐矣。母聒叩者求愈急。再三不已。彼寢者縱不念其友之情而起。然欲免其過迫。亦有以應之。汝之禱於天主。苟懇切若是。必有得也。又曰。世未有子求食。而父與之石者。求魚而與之蛇者。求卵而與之蝎者。爾曹父子間有不善者。尚不以不堪之物遺其子。況在天爾輩大父。有所求而不與之美善神物哉。

論積天財及守貞防死候

第五
章

有兄弟分產不決者。詣耶穌乞折之。耶穌曰。孰使我爲判吏。而折汝之產。因勸諭曰。貪吝之戒。謹宜防之。夫養生豈在多財哉。昔有富人。一歲大穰。恐糜之莫容也。撤舊廩而高廣之。自謂可多藏。永享不匱矣。天主語之曰。狂乎。汝不知今夕有索汝命者。爾所蓄爲他人得。將安用之。吁。不爲靈魂積德。而爲肉身蓄財。類如斯矣。復顧諸弟子曰。爾勿過慮衣食。大父知爾需。宜先求天國。及諸德義。則其日用糧。必允賜爾。小子切勿復懼。蓋大父欲以天國與爾。故寧罄所有濟貧乏。積不匱之囊。以藏天國。無

賊偷無虫壞。是爲愈矣。况爾財所在。爾心亦偕焉。耶穌又謂諸徒曰。腰間宜束之。指守貞意。宜持光燭於爾手。如待主翁夜歸者。一

叩而啟。幸哉此僕。主翁一至。見其醒以候。必將厚賞焉。又譬防夜偷。不寐以備之。爾亦宜如是。以候人子意外之來格。伯鐸羅問曰。吾主爲吾輩設是譬與。抑爲衆人乎。耶穌曰。凡爲人僕。明知其主之意。而不順行以預備者。見責必重。若未知主意者。雖有可責。必稍恕焉。且凡所受愈多。其責望之亦愈多矣。

喻主恩寬容亟宜改圖

第六
章

耶穌曰。不痛悔補贖己罪者。其罹重刑必也。乃設譬以醒衆曰。

有植肥菓樹於園者。他日覓其實而絕無也。乃召園父。謂之曰。予每來覓實於此樹。而未有結者。已踰三載於斯矣。亟斫之。勿容虛占地也。園者祈曰。吾主尙待一年。容予糞之培之。或可結實。不爾。則斫焉可矣。

瞻禮日伸僂者

第七
章

耶穌於瞻禮日。在堂講道。有婦人僂僂負病十八年。耶穌見而命之前曰。汝病解矣。以手撫之。其婦輒舒身稱謝。執事者乃以瞻禮日不宜作爲。語衆人曰。有欲求療者。宜於前六日。不宜瞻禮日也。耶穌曰。此誠詐善之流。汝瞻禮日。縱其牛驢飲水。亦必

解其繫。况亞罷郎之子女。被魔拘繫。十有八年。忍不解乎。執事與諸忌者。皆色沮語塞。而士民見耶穌行事。大能殊絕。不勝踴躍。

哀都人

第八
章

耶穌往都城。便道行教郡邑。有問於耶穌者曰。世人沉淪。能脫離而升天者寡歟。耶穌曰。天門最窄。汝宜勉入。蓋多有求入不得者。且東西南北四裔之人。將有來而同古聖宴於天國者。而汝輩或見外焉。先者後而後者先也。

此指如德亞人。聞教先於四裔。信行後於四裔。此

時發利塞俄諸人在焉。謂耶穌曰。宜早離此。黑落得欲圖爾。耶

蘇曰。汝宜告彼狐詐者。以我驅魔拯疾。功今鑿始。越三日而後

成也。

三日云者。不久之謂也。成云者。指爲萬民受苦。以成救世之功也。

然此三日間。又宜顯迹。

惟不可令先知者。在協露撒稜之外而亡也。

如德亞國古先知者。多在此都城而

亡。故耶蘇曰。我亦當在此致命也。

因頻呼協露撒稜而發歎曰。汝常殺先知者。

又以石擊諸使者。我屢欲鳩汝子。卵翼之如鳥。而汝終不欲也。

吁。汝之宅。必將無居人矣。我再爲言。從此至於汝輩。將讚頌因

主命而來者。不復見我矣。

讚頌事。見六卷九章。

瞻禮日救蠱者

第九
章

學士長老於瞻禮日。宴耶穌。衆觀其舉止。適有病蠱者在。耶穌問諸老宿曰。瞻禮日。可療病者乎。衆無語。耶穌撫其人而救之。去。復謂衆曰。爾有牛羊墮坑阱。於瞻禮日不挈之出乎。衆莫能對。



甲 耶穌於禮

日赴長老宴

問老宿禮日

可療病否、

乙 蠱病人、

丙 老宿無辭

答主、

丁 博學士、

戊 吾主設禮

日牛羊墮阱

喻、

己 宴賓處、耶

穌設喻訓人、

奉命以天恩濟世各神官圖其其惡期命對夫救痛其

邪穢獲其其坐齊問其父曰何幸而得享天國之其平

以哀備天國

亦其此舉蓋益通

亦人冠弁亦其

亦其亦其亦其

亦其亦其亦其

亦其亦其亦其

亦其亦其亦其



赴宴訓賓主

第十
章

耶穌赴長老宴。見有喜居上座者。醒之曰。凡遇會。毋遽當尊席。恐更有尊者後至。主人必命汝讓。爾不免含羞退也。孰若居下位。主人延而升。榮何如也。又語主人曰。爾具醢。勿延親隣富貴之人。恐彼亦具醢。令爾受其報也。爾第延貧賤有疾者。則汝更有功。且幸焉。蓋彼無以爲報。爾必獲報於善人復活之日矣。

以宴論天國

第十
一章

耶穌赴宴。在坐者聞其教。曰。何幸而得享天國之宴乎。耶穌曰。今有治庖。大延賓客者。時當餉矣。供具悉陳。命僕夫速諸賓。賓

拒謝。或曰。我新營別業。欲往觀。無暇也。或曰。我婚娶。不能赴也。僕夫反命。主人怒。令速之市中。覓殘疾貧苦者來。以充賓筵。尙有虛位。主人再謂僕曰。亟往挽道路田野閒者滿之。先召之賓。

弗克嘗我席一臠也。

此耶穌寓言。指天主初立聖教。備以諸德全美。令萬民歸依。如備大筵以待客然。界

人以性光。使知所當趨。又篤生古來諸聖。命傳聖訓。如速客享筵焉。奈人多留戀俗情。不慕聖道。財欲之念。奪其敬主之誠。故廣邀田市間之流。無問貧富貴賤。苟肯赴命。可得享主恩。與上天之永福也。其過愛世樂者。終見絕於上主大筵。乃自取之譴耳。悲夫。



甲 主人備席
讌客

乙 主人命僕
速客

丙 客以新營
別業辭不赴
讌

丁 客以市牛
五耦爲辭

戊 客以新婚
辭謝

己 僕返命主
人令邀貧病
者登席

庚 貧病之人
僕夫又令

辛 田野諸人來
充虛座

壬 不信救世
之人何異不
肯赴宴



論輕世

第十章

耶穌出從者濟濟。語之曰。若欲親就我。而不謝父母妻子。并輕己生命。非吾徒也。不背負己十字架而從我。亦非吾徒也。卽如爾欲創一宅。不豫揆其所有之費。輕築基焉。後鮮克終。人必笑之。興師伐國。必先料吾士卒萬人。可當彼二萬。則戰。否則寢兵焉。又曰。爾輩不能謝其所有。則不爲我徒矣。又曰。鹽。美物也。苟失其味。孰能加以鹽之味。味失。無所用之。卽置糞土中亦無益。必委棄道傍而已矣。又曰。能悟者悟之。

世人就吾主而爲徒者。有二。其一。信從聖教。遵

守誠命。此不甚難。且人分所當爲者。若是。則不必豫慮。而當猛進者也。其一。不惟願從教令。且矢志絕財。絕色。絕意。甘心居貧。

守貞聽長者命終身不變如宗徒輩者此乃超性真修非人所易能也必當豫審其力不至半途易志故設諸喻以曉人也

自證眞主渡河以居

第十
三章

耶穌瞻禮於京都步聖堂廡下衆擁前後問之曰爾誠是契利斯督幸明言之毋使我輩懸疑耶穌曰我自證則爾輩未信今因大父所爲之事可證我矣爾輩不信匪我羣中之羊也我之羊聞聲隨我我識之而與之常生孰有敗斯羣脫離我手者我父所與我固出萬物上亦孰有離於吾父之手我與父一耳衆聞之怒欲投石擊之耶穌曰我因父爲爾行種種美事爾以何者爲謬而擊我耶衆曰非爲爾有謬事但因爾妄言以人而稱

爲天主也。耶穌曰。爾不觀經中言乎。經曰。爾皆爲陡斯也。

陡斯西方

至尊之稱。聖額我畧註曰。陡斯之稱有三。一真稱。爲天地萬物之主。因其本性固爲陡斯故。二義稱。爲奉教篤信之人。因其體備主之訓旨。而近於主故。其三。則邪神僭稱也。茲經所稱。獨循次義。其義蓋爲信從者之謂。信從

者尙可通稱。况大父之所聖。遣出人世者乎。何乃因自謂其子。

卽以爲妄耶。若我不爲吾父之功行。則爾必不信。旣爲父之功

行。爾雖不我信。亦宜信其功行也。苟信我之功行。則可知父與

我偕。我與父偕矣。衆不明。欲執耶穌。耶穌不受執而行。尋渡若

而當河以居。若而當乃初若。翰受洗處也。是時從耶穌者甚衆。咸謂若翰未

嘗爲靈異事。獨所指耶穌事。語語皆真。故多信從者。耶穌居此

地。令病者咸起。又多方化導之。





甲 耶穌率徒
施訓親愛罪
人

乙 補伯利葛
諾等恭詣耶
蘇聆受聖訓

丙 發利塞俄
以耶穌與罪
人偕妄生擬

丁 耶穌喻育
羊羣

戊 逃亡之羊
覓羊之人

庚 獲羊甚喜
肩負而歸

辛 聚鄰人共
慶獲羊

壬 婦人燭室
徧索銀錢

癸 既獲銀錢
鄰人來慶



論罪人可矜

第十
四章

都城有征稅吏。通國目爲罪人。吏偕他負罪者。往見耶穌。欲受教也。學士輩惡之曰。彼皆惡徒。何可納。耶穌曉之曰。今人有百羊。偶亡其一。必置九十九羊於安地。而遍覓其所亡之一。旣得。則負以返。聚鄰友共爲之慶也。蓋九十九羊。善人也。所亡一羊。罪人也。得善人九十九。不若得一罪人回心嚮道。則喜宜倍矣。又曰。人有銀錢十。偶遺其一。必舉家反復共索之。其得之也。喜亦更甚。鄰人且相慶也。上天諸神。得一罪人悔過。其大喜悅亦如是。





甲 蕩子之父、

乙 蕩子悔過、

乞父赦罪、

丙 僕役出新

衣履、金戒指、

丁 宰牛備酒、

戊 殷勤設席、

己 張樂喜慶、

庚 司門稚子

報兄弟歸、

辛 長子友人、

壬 長子不肯

入室、父出曉

諭、



論蕩子改過

第十
五章

耶穌又曰。昔有生二子者。其少欲析居。父勉從之。既析。挾貲蕩遊遠方。慾色無度。盡耗其所有。寄食於人。令豢豕。飲食不充。至欲取給於豕食之菓。顧豕食亦非其所得專也。自念一豕弗若。於是始大悔曰。我父僕役皆得宿飽。我乃饑餓將死。嗟夫。曷不亟歸而告父曰。我獲罪於天主。并獲罪於爾。今後不堪稱爾子。願充僕役而甘心焉。父見之不禁憐憫。抱其首。亟携入室。取鮮衣衣之。金寶戒指飾之。又宰犢酌醴。張樂宴勞之。長子從外來。聞鼓樂之音。竊以詢稚子。稚子曰。弟歸。父宰犢設飲爲歡。長子

悲。遂不肯入。父出諭之。長子曰。我依膝下有年。未嘗忤父命。我
借友未嘗蒙一羔羊之宴。弟悉蕩父貲以歸。何宰牘而饗也。父
曰。兒長膝下。吾所有。皆爾有也。爾弟久出而今歸。則死而復生。
亡而復得。故宜慶矣。

吾主之意。蓋譬善惡之人。皆天主視之如
子也。惡者受天主所賜諸恩。乃多行不義。

奴于魔鬼而靈魂無德。不勝倏焉。一旦痛悔
來歸。謙卑求宥。尤吾主所憐而倍愛者也。



甲 富翁責僕
耗產，擬斥退
之、

乙 莊僕、

丙 僕覓負主
債者、

丁 僕往負債
之戶、

戊 僕易券，減
應償之數、

己 耶穌訓人，
捐資廣交，俾

異日，獲庇於
天上、

庚 發利塞俄，
非笑圭言，主

訓責之、



論輕財忠主

第十
第六章

耶穌語弟子曰。昔有富翁。令一僕董業產。有發其浪費於主父者。主父責而罷之。僕因自忖。將爲農乎。則筋力弗逮。行乞乎。則羞愧不堪。計無所出。乃覓其夙稱貸於主父者。油百器。則易券而書五十。麥百斛。則易券而書八十。蓋以廣結衆人。圖後報也。噫。夫夫也。亦善於自計矣。世人計世務。視修德者之圖善。更詳密如是乎。故吾告爾輩。亦宜捐世資。廣結良友。俾汝異日。不能有作爲時。庶幾永託庇於天上焉。又曰。人於小事不忠信者。未有忠信於大事也。臨世財而有不信。大事可付托乎。不忠他

人之事。己事亦可知矣。夫一人不能事二主。事二主。則必至一
愛一憎。以天主爲主而事之者。能復以世財爲主而事之乎。發
利塞俄貪吝人也。聞而笑之。耶穌謂曰。汝輩務飾莊於人間。然
天主盡知汝心矣。大抵世俗所謂高。天主則深惡以爲卑耳。夫
古經及先聖所傳。至若翰已矣。此後天國之好音。必徧傳於天
下。爲人律度焉。蓋天地尙有可變。經中之語。毫芒不可易也。

論夫婦 第十
七章

發利塞俄諸人就耶穌而難曰。人之妻無大故。亦可棄乎。耶穌曰。汝輩豈不觀經云。造物主之初生人也。始造一男一女。而諭之。可遠父母。近於匹配。以夫婦身雖二。實合爲一體也。故造物主之所締結。人不得而解之。曰。既如是。奚爲梅瑟所傳之道。許作離券以棄妻耶。耶穌曰。梅瑟權容汝輩棄妻者。爲爾梗心故也。若在厥初。必不其然。我實告爾。人有妻縱犯奸。可棄也。不可再娶也。再娶必爲奸人矣。有娶之者。亦必爲姦人矣。問難畢。所從弟子退而問曰。婚姻之事如斯。其爲婚姻也亦難矣。耶穌曰。

此義豈人人能知者乎。惟天主與之知而始知焉。蓋有生而闕

者。有爲人所闕者。有爲天國而自闕者。能悟者知之。

所言闕者。指童貞也。

蓋吾主以婚娶之難。欲勸人守貞也。猶云設使生而闕。或爲人所闕。終身必守貞。然既不出本願。絕慾無功。毋寧上志守貞。功德不更大乎。但大主不以此爲嚴命。待人自願立功。故曰能悟者知之。



甲 富翁臨終

儻恐身受病

苦、

乙 妻孥在旁

慟哭、

丙 盜賊爭取

家資、

丁 屍葬於地、

魂墮於獄、

戊 辣雜珠心

地坦安、終後

天神接其魂、

置靈薄古聖

所、



論貧善富惡死後殊報

第十
八章

耶穌諭衆曰。昔有富人。日衣華服。豐筵長飲爲樂。乞人辣雜瑛。徧體瘡痍。行乞其門。思饜餘瀝。莫與也。因仆地。犬舐其瘡焉。後

辣雜瑛死。天神接取其神魂。置亞罷郎之懷。

卽靈薄處也。蓋古聖死後暫安居靈

薄所待耶穌救世後同升天也。懷云者安樂最邇於古聖之意也。

富人亦死。墮地獄永殃。苦不

堪。昂首遠見辣雜瑛於亞罷郎之懷。乃向亞罷郎而號曰。罷德

肋。

譯言父也。尊稱之意。

亞罷郎憫憐我。乞遣辣雜瑛。以指點滴水於我舌。

解焰中須臾之焦。亞罷郎曰。吾子盍憶在世之樂。辣雜瑛之苦乎。則今宜彼受慰而汝受苦也。况我與汝相隔寥絕。卽我欲近

汝欲近我。皆不能矣。富人哀懇曰。幸爲我遣辣雜瑒。傳示吾家。以我與彼爲證。我有昆弟五。令勿如我墮此極苦所也。亞罷郎應曰。汝之弟兄。有梅瑟與諸古聖之訓。亦已足矣。富人曰。否。得死者起而詳語之。後悔必切而向於善矣。亞罷郎曰。不然。若不遵梅瑟及古諸聖之訓。卽有死者復活而告之。亦不信矣。



甲 古聖亞羅
耶、

乙 乞人辣雜

琮、生前甘貧

耐苦、死後安

居靈薄、

丙 富人生前

宴樂、死後魂

入地獄、乞亞

罷郎、發辣雜

琮以滴水解

渴、并代告家

人、均不蒙允、



訓諸徒

第十
九章

耶穌諭諸徒曰。不善之表。世所不無。噫。夫人也。禍曷能免哉。倘令小子效尤。無寧繫磨石於頸。而投之海。又曰。爾宜自省。若爾兄弟獲罪於爾。宜責之。若悔。宜恕之。且一日間獲罪於爾七。乃又七悔於爾。亦宜恕之。諸徒始向吾主曰。願增益我信德也。耶穌曰。若爾信有大如芥實。卽命彼樹自拔而遷於海。必如爾命矣。又曰。爾輩孰有僕耕牧於野。歸而命之安佚乎。必命先備食。以供主而後飯焉。雖如是。亦安有因其服勞而致謝乎。則爾輩既盡行所命。尙須云。吾乃無益之僕。惟行所當行者耳。

隱示天國臨格

第二章
十章

發利塞俄諸人問耶穌曰。天國臨格何時。耶穌曰。天國之靈。非有顯迹。亦非有人能言在此在彼也。天國卽在爾輩中。乃向弟子曰。此後爾輩卽欲一日更遇人子者。不可得矣。顧彼時有人爲言在此。言在彼。爾不宜就而從之。蓋人子者有日如掣電。下自層霄。光耀頃刻間。指審判日。但豫宜受諸苦。又爲非類擯辱也。昔者諾厄所歷跡。正爲人子者後來之像。噫。當時天下人民。嬉逐於酒食婚配。迨乎諾厄登舟。洪水驟至。孰知其溺而盡也。詳見前。又如洛特時。衆樹藝飲食。營居貿遷之不輟。而孰知洛特方離

索多抹城。天降硫火。焚燒倏盡。夫人子之顯臨亦如是矣。當顯

臨時。人或升屋。勿思降而覓物。或耕於野。亦勿思旋歸。切當記

彼洛特妻之事。

索多抹邑。多尙拂性之男色。天主欲滅之。但其城有賢者洛特。乃預遣三天神。化美少年詣焉。

衆悅其姿。咸趨擁之。天神入洛特門。衆猶窺伺。卽降罰其目俱盲。天神告洛特曰。天主深惡此方。意欲明日燬其地。諭爾急避。切勿回顧。洛特携妻子行。未幾火光燭天。其妻回顧。化爲鹽形。至今此地爲汚池。其中皆臭惡灰燼也。又曰。彼時

有二寢者。一見取於我。一見遺。又有兩婦同在磨室者。亦一見

取。一見遺。有同田作者。亦一見取。一見遺。宗徒又問此等事。見

於何所。耶穌曰。但有肉軀之所。則啞已辣集焉。

啞已辣。好食人屍之鳥。耶穌不

欲預洩所降之地。故言此寓意耳。猶云。我所降之所。卽衆人必聚焉。

論禱主貴懇而謙

第二十章

耶穌諭衆以祈禱之功。不可倦而有間。曰。一聽斷官。上不畏主。下不畏人。有婺婦愬冤。不爲理。數來數麾。久之。官忽自念。我雖無所畏。亦將爲判焉。免聒我耳也。夫彼官非良牧。尙不絕此婦之求。况天主至慈。豈絕爾頻號乎。復向平日自恃而輕人者曰。今有二人齊登聖堂祈禱。一乃發利塞俄。一乃補伯利葛諾。貪賄其學士自矜容止。禱曰。謝大主。我不若人之偷盜無義奸姪者。又指彼人曰。我亦不若此曹。我於七日內。兩日齋。一歲之稔。獻主堂者什之一。其吏自分卑陋。遠跪堂隅。俯首擊胸。不敢仰



甲 聖殿第三

重

乙 聖殿第二

重

丙 衆人瞻禱

之所

丁 發利塞俄

進堂祈禱誇

揚已功

戊 補伯利葛

諾遠立堂隅

擊胸悔罪

己 司堂副祭

庚 堂前欄杆

視。惟曰。望主憐我罪人而已。斯二人者。方其初入時。則發利塞。俄似潔。補伯利葛諾似污。迨既祈禱而出。則潔者污。污者潔矣。蓋上主喜謙惡傲。其自高者必抑。自卑者必掖。



因孩示訓

第二十章

耶穌講道。每有人進嬰孩。祈手撫降之福者。諸弟子恐褻聖師。厭而阻之。耶穌更進諸孩於前曰。容小子親我。勿禁也。蓋天國正彼所有。我實告爾。欲升天國而無此嬰孩之心者。則不得入矣。語畢。乃一一撫其孩而降福焉。



甲 耶穌撫嬰

祝福，謂欲升

天國，須具孩

心、

乙 宗徒等謹

聆聖訓、

丙 誠實嬰孩、

為主親愛、

丁 領嬰孩前

來，求主降福、





甲 耶穌告弟

子，有財者進

天國實難，

乙 富少年聞

諭絕財從主，

頗有難色，

丙 宗徒謝絕

世榮，隨從吾

主，

丁 伯鐸羅問

有財者進天

國，何若是之

難，

戊 凡欲棄俗

精修，父母兄

弟姊妹，俱當

舍棄，

諭舍財以得天國

第二十章

耶穌出至途中。一富室少年趨跪膝前。稱曰。善哉吾師。我何爲而得常生乎。耶穌曰。汝何稱我善。夫善惟一天主耳。爾欲常生。

須守誠。富者曰。何誠。耶穌曰。毋殺人。毋行邪淫。毋偷盜。毋妄證。

毋欺詐。惟務孝敬父母。愛人如己。富者曰。是乃自幼遵守者。今

不識尙有何修。耶穌視而憐之曰。爾缺一焉。爾散家貲於貧乏。

必得天上大寶藏矣。誠如是。則來從我。其人聞言。缺缺而去。因

其家貲少豐。不忍舍也。

絕財一事。非天主命。乃勸諭耳。然欲精脩而不割財帛之念者。未之有也。耶

穌顧謂弟子曰。胡有財者。進天國之難耶。弟子竊異此言。耶穌

曰。我復語爾。以駱駝穿針孔尙易。有財者之進天國實難也。弟子更異。咸曰。如是孰能升天乎。耶穌曰。就人論則難。就主祐論則無難也。伯鐸羅問曰。吾輩既謝萬物以從遊。將來何如。耶穌曰。我實語爾。爾曹謝諸有從我者。當於人子堂皇審判時亦得列坐。與判以臘以臘阨爾十二宗之子孫也。以臘阨爾古聖人。有子十二。傳代于如德亞國。

國人皆其裔。故耶穌借此以指天下萬民。

凡爲我而舍其兄弟姊妹。父母妻子。田園

宅舍者。吾卽於此世與之百倍焉。及其身後必安享常生矣。第其間多有先者後。後者先焉。



甲 耶穌設喻

論天賞、

乙 家主募傭

治圃、

丙 巳時又募、

丁 午正募、

戊 日昃又募、

己 日暮又募、

募時日輪高

下不齊、

庚 葡萄林、

辛 家督命掌

役者給值、

壬 掌役者各

給一錢、明天

福賞成功之

義、



論天賞

第二十章

耶穌曰。天國

指聖教

譬之家督募傭還值焉。家督晨出募傭。治葡

萄林。約其值。一日與銀錢一。將午更募。日中又募。俱議以公值償之。至日昃。復見他傭若干。羣聚無所事。謂曰。爾曹何爲終日閑立於此。應曰。無人召傭奈何。家督曰。爾亟往我葡萄林間可也。比夕。家督命掌役事者給值曰。從後至始。人與一錢。於是蚤至者。艱然不悅曰。彼一時之工。我蚤至。勞苦不啻倍之。奈何其償與我埒也。家督曰。我夙與汝約一錢。今未缺也。受爾工賞而去。可也。若後至者。與爾均焉。亦惟我所許。於爾何與。抑因我善。

爾目乃自惡乎。

猶云因我爲善以施。爾反視爲不善而自惡也。

後者先。先者後。卽此義。

蓋見召者多。蒙簡者寡也。





甲 耶穌仰天

籲禱、命辣雜

孫復生、

乙 辣雜孫墓、

丙 塞墓石、

丁 辣雜孫復

生、

戊 瑪而大、

己 瑪大勒納、

庚 耶穌門弟、

辛 弔喪親戚、



伯大尼亞起死者於墓

第二十五章

伯大尼亞有兄妹三人。兄辣雜瑜。妹一曰瑪而大。一曰瑪大勒。俱從耶穌遊。耶穌每主其家。

詳見二聖女行實。

辣雜瑜病亟。二妹遣

人告曰。吾主所愛者病矣。意欲耶穌親救之。是時耶穌在若而當河外。伯大巴辣邑。踰三日。始謂宗徒曰。我輩可旋往如德亞之都矣。宗徒曰。彼中人欲以石擊耶穌。奚往焉。耶穌曰。夫一日十二時。晝行不躓。明也。夜行而躓。晦也。今辣雜瑜寢矣。吾欲往醒之。宗徒曰。彼寢。則其病愈矣。蓋不悟所云寢者。而以爲寐。耶穌始明告之曰。死矣。然我爲爾輩喜。將益以堅爾輩之信德。隨

命偕往。多默謂諸宗徒曰。吾偕吾友從吾主。就彼而同死焉可矣。至伯大尼亞。辣雜瑯葬已四日。彼都人士來弔者甚衆。瑪而大聞耶穌至。出郭哭迎。告曰。吾主倘在此。兄不死矣。但今吾主若懇於天主。亦必得之。耶穌曰。爾兄必復活。瑪而大曰。吾固知衆人復活之日。彼必亦復活。耶穌曰。我能使人生。又使人復活。有信我者。雖已死能復活之。其有生而信我者。卽與之永不死焉。爾信乎。瑪而大曰。我固信爾爲契利斯督。天主子之降世者。語畢。旋告其妹瑪大勒納。瑪大勒納趨出。弔者謂必往其兄之墓。競隨之。瑪大勒納乃見耶穌。伏地曰。倘吾主在此。兄不死矣。

悲甚。耶穌見瑪大勒納之悲。又觀弔者咸泣。亦不禁淚下。乃詢其墓所。偕衆往視。復爲隕涕。衆人曰。何愛辣雜瑀之深耶。或曰。彼向者豁其胎瞽。今何不令之不死乎。耶穌視其墓前。有碑塞。命除去。瑪而大稍就之。覺惡氣盛出。卽曰。臭矣。臭矣。葬已四日。不必動矣。耶穌責之曰。吾已言。但汝能信我。其必將見天主。異能盛榮。復何疑。瑪而大聞命。卽徹碑。於是耶穌仰天祈籲。罷德肋頌謝曰。吾父允吾禱矣。固知未嘗不允吾禱也。而茲復爲禱。欲令人知吾父之遣我。言畢。大呼而命之曰。辣雜瑀出。死者卽出。立如生人。尙結手縛足蔽面。耶穌命宗徒去其斂。遂行動如

初。同耶穌歸室。是日親戚來弔。得觀耶穌神能。多投服聖教。瑪而大姊姊。伏拜洪恩。具席饗耶穌與宗徒。辣雜球主席。衆民趨觀。一時歸化。亦有以此靈蹟。趨報於發利塞俄者。

天主降生言行紀畧卷之五終



CONGREGATION MERE DES SOEURS
CONSEILLERES DE L'IMMACULEE-CONCEPTION
2700, CHEMIN SAINTE-CATHERINE
MONTREAL, P. Q., CANADA